





VIXIT, EXCESSIT  
VIR PERILLVSTRIS ET EXCEL-  
LENTISSIMVS

# GOTHOFREDVS DE IENA,

SERENISSIMI AC POTENTISSIMI REGIS  
BORVSSIAE, DOMINI NOSTRI LONGE CLE-  
MENTISSIMI, CONSILIARIUS INTIMVS ET DV-  
CATVS MAGDEBVRGICI EMINENTISSIMVS  
CANCELLARIUS.

## QVOD RELIQVIT EXANIME CORPVS

SVB VESPERAM DIEI HVIVS I. MARTII,  
HONESTISSIMO RITV ET SPLENDIDISSIMO  
COMITATV EFFERETVR:

*QVAS ILLVSTRES EXSEQVIAS*  
VT OMNES ACADEMIAE ADDICTI  
DECORA FREQVENTIA PROSEQVANTVR,  
EIVSDEM PRORECTOR

**PAVLVS ANTONIVS,**  
S. TH. D. ET PROF. P. AC REGII CONSISTORII IN DVCATV  
MAGDEB. CONSILIARIUS,  
OFFICIOSE AC HUMANITER ROGAT ET INVITAT.

Typis SALFELDIANIS,



**D**

etur hoc illustrium in  
rem publicam meritis,  
vt, qvo modo exsequiis  
a promiscua sepultura  
separantur; ita etiam memoriæ, vt  
digni fuerunt, consulatur perpetuita-  
ti. Hoc enim ipsi consiliis, hoc la-  
boribus immensis intenderunt, vt,  
quum ad honestatem referrent omnia,  
virtutis tamen præmium, quod comi-  
tatur res præclare gestas, hoc est glo-  
riam in posteris, ne parui putarent  
aut contemnerent. Est virtus cæ-  
lestis munus: est gloria virtutis indi-  
uulsa comes, in hoc solo seiunctas ra-  
tiones habens, vt, qvum illa ad supe-  
ros

ros cum Mente subuehitur, hæc inter  
mortales remaneat, sed diuturnitate  
sua vere immortalis. Hanc nisi ani-  
mus in posterum præsentiret, si, qui-  
bus vitæ spatiū est circumscriptum  
finibus, eisdem cogitationes termi-  
naret suas; misera sane illorum foret  
conditio, qui laboribus se frangunt,  
& dies noctesque student rei publicæ:  
quod par istis & ignauis apud poste-  
ros esset merces, obliuio, futura. Alit  
magnas animas virtutis & doctrinæ  
gloria, quæ stimulat ad res præclare  
fusciendas, quæ ad perficiendum  
eas corroborat, vt perfectis iis alios  
aliosque fructus, quos ad rempubli-  
cam adferant, meditentur. Non ita-  
que mercede sua ingenia magna sunt  
fraudanda, sed memoria illorum re-  
colatur, sicut meruerunt, & posteri-  
tati commendetur, vt, qui sequuntur,  
exemplo excitati, vestigia impressa

a 2

legant,

legant, eademque virtutis via ad glo-  
riam & immortalitatem contendant.  
Si quando vñquam, nunc certe fu-  
nus apparamus, quod gloriam comi-  
tantem habet, quod exemplo & præ-  
sentibus & qui futuri sunt, luculento  
ad æmulationem est, vt par virtutis  
gloria succedat, aut, si hoc est ni-  
mium aut paucis datum; similitudi-  
nem eius imitando consequantur.  
Nam ad prima adspiranti non inho-  
nestum est, in secundis tertiusve si  
constiterit. In quo nunc versamur,  
tam singulare, tam illustre exemplum  
est, vt cum Virginii Rifi, summi viri,  
funere comparari possit: quod insi-  
gne ac memorabile Romano populo  
spectaculum exhibuit. Annum is  
tertium & octogesimum excesserat,  
quum fato tandem concederet; tri-  
ginta idem annis gloriæ supervixit,  
& legens de se historias, posteritati

inter-

interfuit. Cui summo cum honore  
exsequias paramus , ad ætatem il-  
lius, humana pæne maiorem, quam  
proxime accessit , nec minus per  
multos annos , quid de se posteritas  
iudicatura sit, in historiis ipse legit,  
ab omnibus probari , laudari audi-  
uit , & recte factorum gloria lætatus  
est. Non moramur diutius lectorum : VIR maximus consummatisfi-  
musque erat, qui nuper in viuis esse  
desiit , in memoria autem omnium  
est super , eritque , dum litterarum ,  
quæ æternæ sunt , persistent monu-  
menta : erat, inquit, vir vel solo  
nomine magnus & laudatus **GO-**  
**THOFREDVS DE IENA, SERE-**  
**NISSIMI POTENTISSIMIQUE REGIS**  
**BORVSSIAE , INDVLGENTISSIMI**  
**DOMINI nostri , CONSILIARIUS IN-**  
**TIMVS ET DVCATVS MAGDEBURGICI**

b

ILLV-

ILLVSTRISSIMVS CANCELLARIVS. De  
quo summo VIRO pauca scribere  
contra venerationem est tanti no-  
minis : neque scribere quod decet,  
in nostra est facultate, quum pauci  
sint , qui medium SENIS huius æta-  
tem ; nemo nobiscum , qui iuuen-  
tutem recordetur.. Quantacumque  
autem sunt, quæ ex multis & magnis  
rebus comperta habemus ; tanta ta-  
men omnino sunt , vt perpetua-  
tem famæ & memoriæ mereantur:  
ideoque , dum ad suprema celebra-  
da nostros convocamus , Acade-  
miarum more, quæ rescire potuimus  
de SENE meritissimo , præscribimus  
legenda & meditanda; vt intelligant  
nostrates , quantus & quam excel-  
lens fureit , qui excessit, & quantas  
virtutes secum , reliquens terram,  
ex oculis nostris abstulerit: quo lau-  
dibus

dibus illarum ad æmulationem iuniores excitentur.

Lucem adspexit vir beatissimus  
cic 150 xxiv Novembri extremo,  
editus in Seruestana ciuitate parentibus  
antiquæ nobilitatis, quorum cura  
& ductu ingenium, quod felici sidere  
capacissimum sortitus erat, iis arti-  
bus ac disciplinis, quæ ad verum  
cultum mentis, & vñiversam, quam  
late patet, eruditionem ducunt, fe-  
licissime in patrio Gymnasio imple-  
uit. Sic bene firmatis fundamentis  
in diuersis Academiis, Wittenber-  
gensí, Giessensi, Marpurgensi super-  
struxit, quæ in vastam doctrinam  
ad surgébant, & eiusmodi apparatus  
dabant, qui tum formandæ iuuen-  
tuti, tum Principum rebus maximis  
agendis mirandum in modum suffi-

b 2

ceret.

ceret. Nec vero is illis opibus,  
quas nostra fert Germania, utut ex-  
imiis, adquieuit: quidquid vsquam  
gentium sapientiae & cultus huma-  
nioris est, cupidissime appetebat,  
vt, quod in vsum patriæ aut suum  
esset, inde domum reportaret. Ic-  
circo Batavos ceterosque Belgas  
adiit: in Britanniam traiecit: per-  
agrauit Gallias: in Hispaniæ fines  
penetrauit: transiit in Italiam, &  
omnium harum gentium perdidicit  
sermonem, & abstrusas singularum  
scientias & arcana reipublicæ explo-  
ravit. Is enim peregrinationum  
verus usus est, vt non contenti si-  
mus, vrbes splendidiores, castella &  
palatia, aut pompas satellitii Regum  
atque Principum vidisse; sed illud in  
iis præcipue salubre est ac frugife-  
rum,

rum, vt mores, leges, instituta gentium obseruentur, & principes ingenii ac doctrinæ viri adeantur, consuluntur, & ex sermonibus ipsorum & exemplis, in illustri positis monumento, capiatur quod imitemur, quodque ad nostræ vsum reipublicæ referatur. Erant tunc in Batauis & Britannis viri virtute ac eruditione clarissimi: & Gallia optimis artibus ac disciplinis, etiam legum interpretationis adfluebat: Italia maiores suos, ingenii laudibus illustres, æmulabatur; sic quantas diuitias doctrinæ ac scientiarum in patriam nostrum putemus regesisse: Non latere ignis potest: erumpit, emicat, & circum se omnia illustrat. Eadem vis ingeniourum est, quæ, vt mens ipsa, ad cœlestem ignem originem

C ref-

referunt suam : nec possunt in ob-  
scuro latitare , sed dotes suas igneas  
emittunt, & quoquouersum inclare-  
scunt, nec de publico mereri ac pro-  
desse pluribus refugiunt. Primus  
summam NOSTRI doctrinam Prin-  
ceps sapientissimus CAROLVS  
LVDOVICVS, ELECTOR PALA-  
TINVS, perspexit, cumque non mo-  
do consiliis suis adhibuit, verum  
etiam , vt multos similes formaret,  
Professorem Heidelbergensis Acade-  
miæ , ex ruinis suis belli tumultu fa-  
ctis, nuper instauratæ , constituit.  
Hic cum se paucis annis gesserat, vt  
fama ingenii longe lateque proueche-  
retur: qua factum , vt maximus &  
æternæ memoriae Princeps FRIDE-  
RICVS WILHELMVS, ELE-  
CTOR BRANDEBVRGICVS, in Fran-  
cofur-

cofurtanam illum suam euocaret,  
quem ægre quidem Palatinus, tamen  
dimisit tandem, ac ita eum dimisit,  
vt dotes & virtutes eius COLLEGAE  
BRANDENBURGICO magnopere com-  
mendaret. Ut cooperat vero Hei-  
delbergæ, sic Francofurti etiam in  
dies magis augere rem literariam per-  
seuerauit, adeo, vt gloriosus ELE-  
CTOR idoneum iudicarit, quem in lu-  
cem produceret clariorem, ac ma-  
ioribus rebus, publicisque Imperii,  
admoueret. Itaque cīc iōc CLXII,  
postquam septem annis Francofurti  
cum plausu omnium docuerat, di-  
gnitate Consiliarii intimi ornatum  
Ratisbonam ablegauit, vt in S. Im-  
perii Comitiis celsissimæ Domus  
Brandenburgicæ caussam ageret,  
ibique sedem figeret tamquam annis

c 2 pluri-

pluribus in statione illa permanensurus.  
Hic campum patentiores NOSTER,  
quo ingenium exerceret, invenit:  
hic arenam suam habuit, in qua pro  
gloria & commodis DOMINI sui  
pugnaret: quod ita strenue, tanta-  
que fide ac felicitate peregit, ut alii  
etiam Principes Imperii, Marchio-  
nes Brandenburgici Franconiae par-  
tis vtriusque, Onolzbacensis & Bey-  
rutensis; & Nassovii, Sigensis ac  
Dillenburgicus; item Anhaltini; ali-  
quando etiam Electores Saxo & Pa-  
latinus, & ipse quoque Rex Daniæ,  
caussas suas ei, permittente HERO  
proprio, agendas concrediderint:  
quas singulas etiam, vna cum ordi-  
nariis DOMINI sui (tanta facultas in-  
genii erat) promtissime atque ex eo-  
rum voluntate, quorum erant, ex-  
pedi-

pediuit. Dum Ratisbonæ fuit, splen-  
didæ legationes interuenerunt, quas  
indidem profectus in Electoralibus  
Aulis, Moguntina, & Boiara, & Pa-  
latina, aliorumque Principum, iussu  
ac auctoritate prægloriosi sui DOMINI,  
**ELECTORIS BRANDENBURGICI,**  
obiuit. Idem Princeps ac HEROS  
maximus, possessione Ducatus Mag-  
deburgici auctus, vt antea Mindani  
Principatus, sic anno CIC LXXX.  
noui Ducatus Magdeburgici Cancel-  
larium SENEM nostrum, non roga-  
tus, sponte sua declarauit: nec vero  
propter grauiora in Comitiis negotia  
ille prius, quam CIC LXXXVII. re-  
vocatus Ratisbona est, vt huic mu-  
neri, quod impositum ante fuerat,  
ipse nunc pari fide atque industria  
præcesset. Præfuit omnino, quoad  
d vixit,

vixit, fide summa, indefessa cura  
& industria, vt, nisi grauissimæ ra-  
tiones obstante, ne diem quidem ab  
iure dicundo vacuum prætermitte-  
ret. Nam quamlibet ætas ingraue-  
scerebat, nihil tamen de laboribus in-  
termisit; quo exercendi genere cum  
ipsa senectute pugnauit, & vicit ejus  
incommoda. Firma ei & valida  
natura erat, vt octogesimo ætatis  
anno aurium oculorumque vigor in-  
teger, & mens sibi recte constans,  
ac corpus viuidum ac agile, & sola  
ex senectute esset prudentia. Ex  
quo facile licet intelligere, quæ na-  
turæ bona, quam firma & præstan-  
tia fuerint ante, quam inclinaret ætas  
& in senectam vergeret. Nec mi-  
nor firmitas fuit animi, virtutibus  
raris ac singularibus ad robur istud  
educta,

eduēta , exēcitata ad constantiam.  
Deo pius & deuotus a sacris num-  
quam abfuit : iustitiae sanctus anti-  
stes, a cupiditatibus alienus fuit , in  
neutram a recto partem declinans.  
Humanus & benignus omnibus : in  
pauperes liberalis; cuius rei cum alia  
plura documenta prostant, tum opus  
maximum , quod vltimo molitus  
est , beneficentiam eius perpetuo  
prædicabit. Aedes enim suas in ho-  
spitium , & magnam fortunarum  
partem in alimentum decem nobili-  
bus virginibus, a fortuna derelictis,  
in perpetuum publicauit , quæ quo  
rarior hoc sæculo munificentia est,  
eo clementius a potentissimo REGE  
nostro probata fuit & confirmata.  
Inter tam præclaras res vitam exegit  
suam, ac tandem plenus annis, ple-

d 2

nus

nus honoribus abiit a. d. vi. idus Ianuarias, quo generosa anima, Deo suo confisa, in cælestem patriam, quam vnicce respexerat, placide, sine morbo, sine doloribus, solius senectutis caufsa & satietatis viuendi, est translata. Mortis spolium, ex anime corpus, sub vesperam diei huius decenti magnificentia in sepulcrum inferetur: quas exsequias ut omnes Academiæ addicti, illustres genere, dignitatibus ampli, munebus conspicui, ingenio nobiles, industriaque præstantes, ut æquum est, comitentur; officiose ac humaniter vnumquemque rogamus & admonemus. P.P. Halæ kalend. Mart.

ccc iii.





